

COMUNICATO n. 797 del 05/04/2025

Traduzione in ladino

“Pedies”: per en sabeda ai 5 de oril vegn fora la puntata #480 del program ladin per la televizion

[Ladino] Ence chesta setemèna l'é a la leta l nef apuntament de “Pedies”, rotocalch ladin de informazion, ruà a la puntata nr. 480. I argomenc de chesta setemèna. En domenia ai 30 de oril a Ciampestrin l'é stat festa grana per i 200 egn de la Gejiola dedicada a la Madona de Lourdes. 200 egn de storia metuda ensema tel nef libret dat fora te chesta ocajon dal Comun de Mazin.

Sun Ciampedie i studafech de Fascia se à dat ju co na esercitazion de mèl da fech anter neif e dificoltèdes logistiches; duc i gropes de val à lurà dessema coordiné da na postazion zentrèla per ge fèr front a na situazion stentousa.

“ComunicAzions” l nef podcast plurilingual metù ensema dai studenc de la classes quintes del liceo ladin di lengac l'é a la leta sul canal YouTube – TV Ladina e sun Radio Fiemme 104; la studentes e i studenc i à abù l met, dessame coi professores de lengac, de fèr n percors de formazion, scriver e registrar n podcast per ladin e duc i lengac studié a scola: todesch, ingleis, spagnol e rus.

Tinultima te la rubrica “Piates: chel liber sun scancia”, Alberta Rossi bibliotechèra de la biblioteca Pare Frumenzio Ghetta de la Majon di Fascegn, la ne porta dant il "Postiglione delle Dolomiti": na regoeta de sfoes publiché dal 1957 al 1984 per endrez de Guido Iori Rocia.

I report de chesta setemèna, enjigné da Riccardo Zanoner, Angela Pederiva e Sabrina Riz, i vegn porté dant da la ousc de Angela Pederiva.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su Trentino Tv – canal 10 de TN- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun AltoAdige TV – canal 11 de BZ - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevizionLadina>

Traduzion di Servijes Linguistics e Culturèi del Comun general de Fascia

(cdt)